



# Pour napa linite si napa en sans disiplin

**N**ou prezidan ti fer resor-ti a lokazyon Lazournen Lendepandans sa lannen ki dan Sesel napa lespas pour laenn e divizyon. I ti dir ki i absoliman nesese ki koman en pep nou reste ini. Annefe, tou dilon son kanny politik, Prezidan Ramkalawan in toultan pres nesese pour linite. Se selman atraver linite ki i kapab annan stabilite politik nesese pour progresyon nou nasyon.

Linite pa vedir toler nenport kwa. I sertenman pa

vedir toler bann aksyon e konportman ki met retar dan devlopman pei. Linite vedir travay ansanm pou byennet Sesel malgre nou diferans e annan en serten tolerans e respe anver lopinyon lezot.

Malerezman i annan en tandans pour bokou dimoun krwar ki linite vedir toler aksyon lezot malgre zot bann aksyon i kapab annan konsekans negatif pour kominote e pei an zeneral.

Travayer servis piblik i annan en lobligasyon enplimant polisi gouvrenman dizour dan en fason efikas. Par kont, i annan bokou travayer (*kontinyasyon lo paz 2*)



...napa plas pour laenn ek vanzans...

## Gouvrenman LDS i reste angaze

**M**algre bokou leseypou met lobstak, gouvrenman LDS i reste determinen pour reisir dan son bann program e promes elektoral. Langazman pour konbat drog e lezot fleo sosyal i reste pli solid ki zanmen. Sa lalit i enn ki pa fasil e gouvrenman i bezwen sipor tou sitwayen. En lopoziyon responsab ti ava ede me sa pa le ka.

Malgre kritik lo ennde lensidan izole, gouvrenman pa pe bes lebra. Okontrer, gouvrenman i reste pli determinen ki zanmen. Gouvrenman i mentenir son promes pour latransparans e i mentenir garanti ki leta pa pou



*Gouvrenman LDS i reste determinen pour reisir dan sa lalit kont drog e lezot fleo sosyal*

servi vyolans kont sitwayen dan okenn loperasyon anti narkotik. Loperasyon pou ganny fer an respektan drwa imen sak sitwayen. Kot i annan lensidan labi par lafors sekirite, lenvestigasyon pour

ganny fer e rezilta a ganny fer piblik. Bokou travay pe ganny fer pour ameylor nou fason loperasyon e i annan progre. Menm lopoziyon in rekonnnet sa malgre zot negativite.

Sesel i reste pour tou son zanfann e gouvrenman i determinen pour garanti ki tou Seselwa i annan loportinite epanouir. Kiswa ou en artis ou en artizan, gouvrenman i rekonnnet son responsabilite pour fasilite zot lepanouisman. Apre tou, gouvrenman in kree bann mekanizm nesese pou rezourd okenn problem ki kapab leve. Dan en pei kot i annan laliberte lekspresyon, tou problem i kapab ganny rezourd osi lontan ki tou partener i azir dan en fason rezonnab.

# Pour napa linite si...


dan servis piblik ki pa konpran sa e ki krwar ki zot ankor kapab fer keksoz dan zot fason. Zot vin en baryer pou gouvènmàn dizour kapab enplimant son program. Dan sa sitiasyon gouvènmàn i oblize retir okenn baryer ki anpes li enplimant son program e sa i enkli termin lanplwa bann travayer servis piblik ki met bar dan son larou. Ki enportan se ki okenn terminasyon lanplwa i ganny fer an linny avek lalwa ki egziste dan pei. I annan bann lenstisyon dan pei kot travayer i kapab rod rekour si zot pa dakor avek desizyon pou fer zot aret travay.

Malerezman bann adverser politik gouvènmàn pe ankouraz travayer sekter piblik pou pa koopere avek gouvènmàn dizour e pe kriy viktimizasyon sak fwa i annan ki perdi lanplwa pour rezon disiplin oubyen ganny nouvo responsabilite an rezilta reform. Sa latitud pa byen ditou.

I fer premye fwa dan listwar Sesel ki i annan en sanzman gouvènmàn atraver bwat vote. I vremen neser pou travayer servis piblik konpran ki zot la pou deservi e enplimant polisi tou gouvènmàn ki ganny elekte. Ozordi dan servis piblik personn pa ganny viktimize pour son krwayans politik. Par kont, okenn travayer pa kapab ganny soutire pou sabotaz travay gouvènmàn. Konpran byen rol e fonksyon servis piblik i esansyel pou konsolid linite nasyonal. Osi lontan ki i annan en group politisyen ki pa demontre en sans respe vizavi bann lenstisyon leta, zot pou reste en menas pour linite nasyonal. Fodre nou osi annan en sans disiplin pour nou tou kapab anmenn linite dan Sesel.

# Prezidan ki deside, pa personn ankor

**P**rezidan Ramkalawan i kontinyen rod sa ki meyer pour Sesel malgre i annan bokou mannev par bann adverser pour detourn lopinyon piblik kont li. Bann largiman anmenen par lopoziyon i vin pli ridikil avek letan. Zot in menm kondann bann vizit ki prezidan in fer aletranze; parey labitid, zot pwen depar i toultan kovid.



Prezidan i ganny envite en kantite landrwa pour en kantite difèran lokazyon me se prezidan ki deside lekel levennman ki i pour asiste. I pa fer sa desizyon zis aköz i oule vizit en pei koman en swa personnel me i fer sa baze lo priorite nasyonal. Son dernyen vizit Lotris ti en bon legzanp pou ilistre sa.

Bi son vizit Lotris sete pou prensipalman asiste en some lo sanzman klima. Isi Sesel, lefe sanzman klima i frap nou toulezour. Nou bann lakot pe degrade e nou bann lans pe ganny ranplase par bann barikad an ros pou anpes plis degradasyon. Avek

nivo lanmer ki pe monte, bokou nou bann zil elwanye pe ganny menase. Anfen, lefe sanzman klima i la pour tou Seselwa vwar. Sa fenomenn i menas nou prop legzistans koman en pep. Se pour sa rezon ki prezidan Ramkalawan ti vwar li neser pour partisip dan sa rankont an Otris pour anmenn devan konsern Sesel e lezot pti leta zil. Bann deba e desizyon ki ti pran dan sa rankont ti annan lyen direk avek nou legzistans koman en nasyon. Nou prezidan ti prezan pour fer tande lalwa Sesel.

Partou kot size sanzman klima i diskite, Sesel i bezwen prezan aköz nou legzistans koman en nasyon i depan lo la. Bann ki pa vwar pli lwen ki zot nennen i kapab kontinyen bawawa.

# 7-enm sapit: 'Pa kler'

**L**opozisyon in fer son 7-enm konferans-de-pres. Zournalis in komans fatigue e nepli annan kouraz pour asiste. Byento sa zafer pou transformen e vin en 'tete-a-tete'. Si ti annan en tenm pou servi, 'Pa Kler' ti ava tre apopriye.

Dokter Herminie ti deside zot pa pou fer okenn

komanter detaye lo program Fon Moneter Enternasyonal aköz i pa ankor kler. Dan prosen konferans-de-pres i ava fer komanter lo la.

Sa dokter i osi pa oule fer okenn komanter lo sa zafer bonm kot de endividi in ganny arete. I bezwen plis lenfor-

masyon e i a fer en komanter ler i a kler lo tou keksoz.

Sekreter Zeneral Dick Esparon in fer en long eloz lo Fon Pansyon. Finalman



son konklizyon sete: fodre i ganny tou keksoz kler e apre i ava fer son komanter.

Depite lider parti Jacqueline Dugasse in mangonnen lo size Air Seychelles. I dir gouvènmàn pe tarde pran en desizyon lo lavenir sa lakonpanyen. Aköz sa retar par gouvènmàn? Msye Dugasse pa kler.

**Finalman : si zot napa nanryen pou dir, pa dir nanryen. Pran zot en desizyon !!**